

ა(ა)იპ - ივანე ჯავახიშვილის სახელობის თბილისის სახელმწიფო უნივერსიტეტის აკადემიურ თანამდებობაზე 65 წლის ან მეტი ასაკის პირის არჩევის და თანამდებობიდან გათავისუფლების, ემერიტუსის აკადემიური წოდების მინიჭებისა და ანაზღაურების მიცემის წესი და პირობები

მუხლი 1. აკადემიურ თანამდებობაზე 65 წლის ან მეტი ასაკის პირის თანამდებობაზე არჩევისა და თანამდებობიდან გათავისუფლების წესი

1. ა(ა)იპ - ივანე ჯავახიშვილის სახელობის თბილისის სახელმწიფო უნივერსიტეტის (ტექსტში შემდგომ - „უნივერსიტეტი“ ან „თსუ“) აკადემიურ თანამდებობაზე 65 წლის ან მეტი ასაკის პირის აკადემიურ თანამდებობაზე გამოცხადებულ კონკურსში მონაწილეობის მიღების საკითხი წყდება უნივერსიტეტის აკადემიური საბჭოს მიერ, სრული შემადგენლობის უმრავლესობით, აკადემიური თანამდებობების დაკავების მიზნით გამოცხადებული ყოველი ცალკეული კონკურსისათვის.
2. აკადემიურმა საბჭომ აკადემიურ თანამდებობაზე გამოცხადებულ კონკურსში 65 წლის ან მეტი ასაკის პირთა მონაწილეობის შესახებ გადაწყვეტილება შეიძლება მიიღოს მიზანშეწონილობიდან გამომდინარე ცალკეული ფაკულტეტისათვის ან ფაკულტეტის ცალკეული მიმართულებისათვის.
3. უნივერსიტეტის 65 წლის ან მეტი ასაკის აკადემიური პერსონალის თანამდებობიდან გათავისუფლების საკითხი რეგულირდება შესაბამისი შრომითი ხელშეკრულების, უნივერსიტეტის წესდების, უნივერსიტეტის სამართლებრივი აქტებისა და მოქმედი კანონმდებლობის საფუძველზე.

მუხლი 2. უნივერსიტეტის აკადემიური თანამდებობის პირისათვის ემერიტუსის წოდების მინიჭებისა და ანაზღაურების მიცემის წესი და პირობები

1. „ივანე ჯავახიშვილის სახელობის თბილისის სახელმწიფო უნივერსიტეტის ემერიტუსი“ (შემდგომში – ემერიტუსი) წარმოადგენს უნივერსიტეტის მიერ კანონმდებლობის საფუძველზე დაწესებულ აკადემიურ წოდებას.
2. ემერიტუსის“ აკადემიური წოდება ენიჭება პირს, რომელიც ამ წოდების მინიჭების შესახებ განაცხადის გაკეთების მომენტისათვის:
 - ა) არის 65 წლის ან მეტი ასაკის;
 - ბ) უკავია უნივერსიტეტის სრული პროფესორის თანამდებობა;
 - გ) ორჯერ მაინც იყო არჩეული უნივერსიტეტის სრული პროფესორის თანამდებობაზე;

დ) აქვს თსუ-ში სამეცნიერო-პედაგოგიური მუშაობის არანაკლებ 20 წლის გამოცდილება (თსუ მედიცინის ფაკულტეტის თავისებურებებიდან გამომდინარე ამ ქვეპუნქტით განსაზღვრული გამოცდილება არ უნდა იყოს 15 წელზე ნაკლები).

3. ემერიტუსის წოდება პირს ენიჭება შრომითი ხელშეკრულების ვადის გასვლისთანავე. უფლებამოსილ პირს, მისი შრომითი ხელშეკრულების ვადის ნახევრის გასვლის შემდგომ, მაგრამ ხელშეკრულების ვადის გასვლამდე, აქვს უფლება მოითხოვს მისთვის ემერიტუსის წოდების მინიჭება, სრული პროფესორის თანამდებობიდან გათავისუფლების პირობით. ემერიტუსის წოდების მინიჭებისთანავე იგი თავისუფლდება უნივერსიტეტის სრული პროფესორის თანამდებობიდან.

4. უნივერსიტეტის 65 წლის ან მეტი ასაკის სრული პროფესორი, უფლებამოსილია მიიღოს გადაწყვეტილება და გააკეთოს განაცხადი ან ემერიტუსის წოდების მისანიჭებლად ან უნივერსიტეტის აკადემიური თანამდებობის დასაკავებლად გამოცხადებულ კონკურსში მონაწილეობის მისაღებად. იმ შემთხვევაში, თუ შესაბამის აკადემიურ თანამდებობაზე გამოცხადებულ კონკურსში მონაწილეობის მიღების შესახებ განაცხადის გაკეთების შემდგომ პირი ვერ დაიკავებს პროფესორის თანამდებობას, იგი კარგავს ემერიტუსის წოდების მინიჭებაზე განაცხადის გაკეთების უფლებას.

5. უნივერსიტეტის ემერიტუსის წოდების მქონე პირს უნივერსიტეტის მიერ მიეცემა ყოველთვიური ანაზღაურება:

ა) მე-2 მუხლის მე-2 პუნქტის „დ“ ქვეპუნქტით გათვალისწინებული არანაკლებ 20 და არაუმეტეს 25 წლის გამოცდილების არსებობის შემთხვევაში 500 ლარის ოდენობით;

ბ) მე-2 მუხლის მე-2 პუნქტის „დ“ ქვეპუნქტით გათვალისწინებული არანაკლებ 25 და არაუმეტეს 30 წლის გამოცდილების არსებობის შემთხვევაში 650 ლარის ოდენობით;

გ) მე-2 მუხლის მე-2 პუნქტის „დ“ ქვეპუნქტით გათვალისწინებული 30 წელზე მეტი გამოცდილების არსებობის შემთხვევაში 800 ლარის ოდენობით.

6. უნივერსიტეტის მედიცინის ფაკულტეტის თავისებურებებიდან გამომდინარე, ამ წესის მე-2 მუხლის მე-2 პუნქტის „დ“ ქვეპუნქტით გათვალისწინებული არანაკლებ 15 წლიანი გამოცდილება უთანაბრდება ამ მუხლის მე-5 პუნქტის „გ“ ქვეპუნქტით გათვალისწინებულ არანაკლებ 30 წლიან გამოცდილებას, მისი თანმდევი სამართლებრივი შედეგებით.

მუხლი 3. დამატებითი პირობები

1. ემერიტუსის წოდების მქონე პირმა შესაძლებელია მონაწილეობა მიიღოს უნივერსიტეტის საგანმანათლებლო და სამეცნიერო საქმიანობაში, შეასრულოს როგორც ანაზღაურებადი, ისე არაანაზღაურებადი სამუშაო, აკადემიური და ადმინისტრაციული თანამდებობის დაკავების გარეშე.

2. ემერიტუსის წოდების მქონე პირმა, უნივერსიტეტის გადაწყვეტილებით, შესაძლებელია ისარგებლოს დამატებითი სოციალური გარანტიებით, შეუზღუდავად ისარგებლოს უნივერსიტეტის რესურსებით და უნივერსიტეტის

მიერ დაწესებული სხვა შეღავათებით.

3. უნივერსიტეტის ემერიტუსის წოდების მქონე პირს მის მიერ სხვა უმაღლეს საგანმანათლებლო დაწესებულებაში აკადემიური ან ადმინისტრაციული თანამდებობის დაკავების შემთხვევაში უწყდება თსუ-ის მიერ გასაცემი ყოველთვიური ანაზღაურება.

მუხლი 4. გარდამავალი დებულებები (ემერიტუსის აკადემიური წოდების მინიჭების დროებითი წესი)

1. ემერიტუსის აკადემიური წოდება ენიჭება 65 ან მეტი ასაკის პირს, რომელიც იმყოფება უნივერსიტეტთან შრომითსამართლებრივ ურთიერთობებში და ამ წოდების მინიჭების შესახებ განაცხადის გაკეთების მომენტისათვის:

ა) წარმოადგენს უნივერსიტეტში მოღვაწე პირს და არის საუნივერსიტეტო კოლეგიური საკონსულტაციო მოქმედი ორგანოს წევრი;

ბ) წარმოადგენს უნივერსიტეტის სრულ პროფესორს, აქვს თსუ-ში მუშაობის არანაკლებ 25 წლის გამოცდილება (თსუ მედიცინის ფაკულტეტის თავისებურებებიდან გამომდინარე ამ ქვეპუნქტით განსაზღვრული თსუ-ში მუშაობის გამოცდილება არ უნდა იყოს 10 წელზე ნაკლები), მათ შორის უნივერსიტეტის სრულ პროფესორად მუშაობის არანაკლებ 6 წლის გამოცდილება და თავისი საგანმანათლებლო და სამეცნიერო საქმიანობით მნიშვნელოვანი წვლილი შეიტანა შესაბამისი დარგის განვითარებაში;

გ) არის უნივერსიტეტის სრული პროფესორი, აქვს თსუ-ში მუშაობის არანაკლებ 20 წლის გამოცდილება (თსუ მედიცინის ფაკულტეტის თავისებურებებიდან გამომდინარე ამ ქვეპუნქტით განსაზღვრული თსუ-ში მუშაობის გამოცდილება არ უნდა იყოს 15 წელზე ნაკლები), მათ შორის უნივერსიტეტის სრულ და ასოცირებულ პროფესორად მუშაობის არანაკლებ 6 წლის გამოცდილება და თავისი საგანმანათლებლო და სამეცნიერო საქმიანობით მნიშვნელოვანი წვლილი შეიტანა შესაბამისი დარგის განვითარებაში;

დ) არის უნივერსიტეტის ასოცირებული პროფესორი, აქვს თსუ-ში მუშაობის არანაკლებ 30 წლის გამოცდილება (თსუ მედიცინის ფაკულტეტის თავისებურებებიდან გამომდინარე ამ ქვეპუნქტით განსაზღვრული თსუ-ში მუშაობის გამოცდილება არ უნდა იყოს 15 წელზე ნაკლები), მათ შორის უნივერსიტეტის სრულ ან ასოცირებულ პროფესორად მუშაობის 6 წლის გამოცდილება მაინც და თავისი საგანმანათლებლო და სამეცნიერო საქმიანობით მნიშვნელოვანი წვლილი შეიტანა შესაბამისი დარგის განვითარებაში;

ე) არის უნივერსიტეტის ასოცირებული პროფესორი, აქვს თსუ-ში მუშაობის არანაკლებ 40 წლის გამოცდილება (თსუ მედიცინის ფაკულტეტის თავისებურებებიდან გამომდინარე ამ ქვეპუნქტით განსაზღვრული თსუ-ში მუშაობის გამოცდილება არ უნდა იყოს 20 წელზე ნაკლები), მათ შორის უნივერსიტეტის ასოცირებულ პროფესორად მუშაობის 3 წლის გამოცდილება მაინც და თავისი საგანმანათლებლო და სამეცნიერო საქმიანობით მნიშვნელოვანი წვლილი შეიტანა შესაბამისი დარგის განვითარებაში.

2. ემერიტუსის აკადემიური წოდება ენიჭება პირს, რომელსაც 2011 წლის 1 სექტემბრისათვის ეკავა თსუ-ის სრული პროფესორის თანამდებობა, იმავდროულად იყო 65 წლის ან მეტი ასაკის, უნივერსიტეტისათვის წარდგენილი ჰქონდა განცხადება ემერიტუსის წოდების მინიჭების შესახებ, შესაბამისი ფაკულტეტის საბჭოს მიერ უნივერსიტეტის აკადემიური საბჭოსათვის წარდგენილი იყო ამ აკადემიური წოდების მინიჭებაზე, მაგრამ უნივერსიტეტის მიერ შესაბამისი გადაწყვეტილება არ ყოფილა მიღებული.

3. უნივერსიტეტის ემერიტუსის წოდების მქონე პირს უნივერსიტეტის მიერ მიეცემა ყოველთვიური ანაზღაურება:

ა) ამ მუხლის პირველი პუნქტის „ა“ ქვეპუნქტით გათვალისწინებულ პირებს - 850 ლარის ოდენობით;

ბ) ამ მუხლის პირველი პუნქტის „ბ“ ქვეპუნქტით გათვალისწინებულ პირებს - 600 ლარის ოდენობით;

გ) ამ მუხლის პირველი პუნქტის „გ“ ქვეპუნქტით გათვალისწინებულ პირებს - 400 ლარის ოდენობით;

დ) ამ მუხლის პირველი პუნქტის „დ“ და „ე“ ქვეპუნქტებით გათვალისწინებულ პირებს - 300 ლარის ოდენობით;

ე) ამ მუხლის მე-2 პუნქტით გათვალისწინებულ პირებს - 800 ლარის ოდენობით.

მუხლი 5. დასკვნითი დებულებები

1. წინამდებარე წესის მე-4 მუხლის პირველი და მე-2 პუნქტების მოქმედება შეწყდეს 2012 წლის 27 ივნისს.

2. წინამდებარე წესის მე-2 მუხლის მე-2, მე-5 და მე-6 პუნქტები ამოქმედდეს 2012 წლის 28 ივნისიდან.

3. პირს ემერიტუსის წოდება ენიჭება მის მიერ ამ წოდების მინიჭებაზე განაცხადის გაკეთების დროისათვის მოქმედი წესით და მასზე ვრცელდება ამ წესის თანმდევი სამართლებრივი შედეგები.